

四庫全書

史部

欽定四庫全書

欽定外藩蒙古回部王公表傳卷之八十六

傳第七十

扎薩克鎮國公噶爾丹達什列傳

今襲輔國公

噶爾丹達什青海和碩特人姓博爾濟吉特親王察罕丹津從弟其高祖曰達延為顧實汗長子號鄂齊爾汗子六長衮楚克號達賴汗子拉藏嗣為準噶爾所戕次多爾濟子垂庫爾生噶爾丹達什

次索諾木袞布次朋素克次索諾木達什次墨爾根諾顏鄂齊爾汗裔設扎薩克三詳各傳康熙三十六年噶爾丹達什從達什巴圖爾內附五十年詔封輔國公時索諾木達什及墨爾根諾顏子車凌并

賜輔國公爵蓋鄂齊爾汗為顧實汗長嗣世領青海左翼及唐古特衆故其子姓并

賜爵五十九年噶爾丹達什從大軍送達賴喇嘛入藏雍正元年叙功晉鎮國公羅卜藏丹津叛脅之附噶

爾丹達什不從攜屬台吉阿旺達什巴等避至甘
州境署撫遠大將軍貝子延信置之蘇油口內先
是額駙阿喇布坦等遵

旨招降青海諸台吉至盟壇諭之曰爾八家台吉外達賴
汗當遣子弟入

覲尋定議以弟朋素克至

優賚之嗣是朝貢不絕

詔封多羅貝勒朋素克卒子阿喇布坦鄂木布襲其爵至

是以從羅卜藏丹津叛誅之青海定噶爾丹達什
歸牧三年

詔授扎薩克乾隆四年卒子三長扎木三端多布先卒次
丹津納木扎勒次索諾木巴勒濟相繼襲卒皆無
子噶爾丹達什嗣絕

一次襲丹津納木扎勒噶爾丹達什次子乾隆四
年襲扎薩克鎮國公十三年卒弟索諾木巴勒濟
襲

二次襲索諾木巴勒濟噶爾丹達什第三子乾隆十三年襲扎薩克鎮國公尋卒從子索諾木多布濟襲

三次襲索諾木多布濟索諾木巴勒濟從子祖索諾木衮布為鄂齊爾汗第三子有子二長車凌別襲扎薩克輔國公自有傳次垂濟扎木素為協理台吉索諾木多布濟其子也乾隆十三年

詔襲索諾木巴勒濟所遺扎薩克降授輔國公四十七

年

詔世襲罔替以承噶爾丹達什祀

扎薩克輔國公阿喇布坦列傳

今襲罔
山貝子

阿喇布坦青海準噶爾人姓綽囉斯扎薩克郡王

色布騰扎勒從子祖卓哩克圖和碩齊為巴圖爾

琿台吉子游牧阿爾台以避噶爾丹亂徙牧青海

依和碩特族有子四長班第達次巴哈次曼濟次都

勒達爾裔不著次納木奇扎木禪子一即阿喇布

坦準噶爾族與和碩特族世婚察罕丹津弟根特
爾既以噶爾丹女為妻阿喇布坦為噶爾丹從子
察罕丹津復以女妻之噶爾丹亂既平準噶爾族
不附逆者

詔仍游牧青海聽和碩特族與姻好如故康熙五十五年
阿喇布坦來朝

詔授公品級一等台吉時游牧青海之和碩特土爾扈特
輝特喀爾喀諸台吉皆未編設旗隊獨以阿喇布

坦領其族

賜扎薩克職給銀幣如公例雍正元年羅卜藏丹津叛
察罕丹津率孥內徙阿喇布坦與相失尋偕察罕
丹津率桑巴圖等攜戶千四百餘來歸三年

詔晉封輔國公仍兼扎薩克九年

命偕和碩特族扎薩克郡王額爾德尼額爾克托克托爵
選兵萬護青海牧乾隆四年卒子納木扎勒車凌
襲

一次襲納木扎勒車凌阿喇布坦長子乾隆四年
襲扎薩克輔國公十五年自青海赴唐古特次喀
喇烏蘇聞珠爾默特納木扎勒叛馳至布達拉城
護視達賴喇嘛尋大軍定唐古特亂

諭嘉之晉封固山貝子二十三年

詔副都統濟福與議備兵偵防厄魯特逸賊三十五年
卒子齊默特丹巴襲

二次襲齊默特丹巴納木扎勒車凌長子乾隆三

十五年襲扎薩克固山貝子四十七年

詔世襲罔替

輔國公索諾木達什列傳

後授扎薩克

索諾木達什青海和碩特人姓博爾濟吉特
為鄂齊爾汗第五子康熙五十年

詔封輔國公五十一年卒其妻達什扎穆素遣使告鄂齊
爾汗嗣世領左翼和碩特族無長索諾木達什者

有子四長納罕遜都布習沙門法次諾爾布朋素
克索諾木達什令習諸務次納木喀次諾爾布僧
格幼請以諾爾布朋素克襲爵

允之

一次襲諾爾布朋素克索諾木達什次子康熙五
十二年襲輔國公五十九年以兵送達賴喇嘛入
藏雍正元年叙功增俸三年

詔授扎薩克四年卒其妻察罕伊什請以嗣子達什巴爾

珠爾襲爵

允之

二次襲達什巴爾珠爾諾爾布朋素克嗣子雍正
五年襲扎薩克輔國公七年入

覲次鄂爾多斯之巴顏布喇克疾卒無嗣索諾木達什裔
自此絕

詔以其從祖索諾木袞布之子車凌襲

三次襲車凌達什巴爾珠爾再從叔父雍正八年

襲扎薩克輔國公乾隆九年卒子達什扎布襲

四次襲達什扎布車凌第三子乾隆九年襲扎薩克輔國公三十一年卒子根敦端多布襲

五次襲根敦端多布達什扎布長子乾隆三十一年襲扎薩克輔國公四十七年

詔世襲罔替以承索諾木達什祀

扎薩克輔國公車凌列傳

車凌青海和碩特人姓博爾濟吉特鎮國公噶爾

丹達什從叔父其父墨爾根諾顏為鄂齊爾汗季子
有子二長即車凌次班珠爾康熙五十年

詔封車凌為輔國公雍正元年羅卜藏丹津叛脅車凌
及班珠爾附之會準噶爾族貝勒色布騰扎勒避
亂內徙班珠爾從至署撫遠大將軍貝子延信置之
西川口外二年大軍抵青海

上以車凌迎降雖脅從未助逆

詔宥罪仍留輔國公爵三年

詔授扎薩克六年卒子二長色布騰達什次袞楚克扎布
相繼襲

一次襲色布騰達什車凌長子雍正七年襲扎薩
克輔國公乾隆四年卒無嗣弟袞楚克扎布襲
二次襲袞楚克扎布車凌次子乾隆四年襲扎薩
克輔國公十二年來朝扈

蹕木蘭行圍

命乾清門行走

賞孔雀翎十八年卒子垂忠扎布襲

三次襲垂忠扎布衮楚克扎布長子乾隆十八年襲扎薩克輔國公四十七年

詔世襲罔替

扎薩克輔國公貢格列傳

貢格青海輝特人姓伊克明安祖卓哩克圖和碩齊生子第巴號青諾顏第巴子五長呼里特噶次唐古特次巴勒達爾次即貢格次巴勒珠爾初和

碩特族為青海厄魯特長輝特台吉隸之雍正元年羅卜藏丹津叛貢格不之附率昆弟子姓等降大軍復助勦賊黨於哈瑪爾嶺二年亂定王大臣等議青海之輝特請別設旗分佐領令勿隸和碩特族

允之有濟克濟扎布者與附喀爾喀之輝特輔國公巴濟同祖以羅卜藏丹津擾其牧徙屬就之餘仍留處青海三年

詔以貢格領其族授扎薩克一等台吉九年土爾扈特族
諾爾布叛貢格馳兵往擊自喀喇郭勒追至蒙固
爾托羅海獲之檻送大軍

諭曰貢格効力有年前羅卜藏丹津叛時奮勇勦賊今諾
爾布叛逆復傾心無惑竭力追勦著加恩封輔國公乾
隆二十年卒子納罕塔爾巴襲

一次襲納罕塔爾巴貢格長子乾隆二十年襲扎
薩克輔國公三十五年卒子旺扎勒敦多布襲

二次襲旺扎勒敦多布納罕塔爾巴長子乾隆三十五年襲扎薩克輔國公四十七年

詔世襲罔替

欽定外藩蒙古回部王公表傳卷之八十六

欽定四庫全書

欽定外藩蒙古回部王公表傳卷之八十七

傳第七十一

扎薩克輔國公阿喇布坦扎木素列傳

今襲一等台吉

阿喇布坦扎木素青海和碩特人姓博爾濟吉特
扎薩克親王察罕丹津從子父岱青巴圖爾為博
碩克圖濟農長子有子三長即阿喇布坦扎木素
次敦多布鄂木布次車臣圖達賴喀木布蓋自博

碩克圖濟農至阿喇布坦扎木素凡三傳皆長嗣康熙五十九年

詔封輔國公雍正三年授扎薩克九年

命偕扎薩克郡王額爾德尼額爾克托克托爲選兵萬護

青海牧乾隆五年卒無嗣

詔以其弟敦多布鄂木布之子達什納木扎勒襲

一次襲達什納木扎勒阿喇布坦扎木素從子乾

隆五年襲扎薩克輔國公三十年卒嗣子禮塔爾

襲

二次襲禮塔爾達什納木扎勒嗣子乾隆三十年
襲扎薩克輔國公時達什納木扎勒有子隆賁幼
禮塔爾母都噶爾匿不告四十年郭羅克番掠青
海牧禮塔爾以兵拒不敵為所戕四十一年駐劄
西寧副都統惠齡疏奏禮塔爾母匿隆賁狀

詔以隆賁降襲扎薩克一等台吉

三次襲隆賁達什納木扎勒子乾隆四十一年襲

扎薩克一等台吉四十七年

詔世襲罔替

扎薩克一等台吉達瑪璘色布騰列傳

達瑪璘色布騰青海和碩特人姓博爾濟吉特貝勒納木扎勒從子父額璘沁達什為墨爾根台吉第六子有子三長巴特瑪色布騰早卒次即達瑪璘色布騰次博貝額璘沁達什初封固山貝子嗣晉多羅貝勒以附羅卜藏丹津叛論罪削爵故不

立傳雍正三年

詔授達瑪璘色布騰為扎薩克一等台吉轄其衆十三年
議撤駐防準噶爾軍

詔所部仍備兵二千護游牧以達瑪璘色布騰及土爾扈
特台吉色特爾布木領之乾隆十四年卒無嗣弟
博貝襲

一次襲博貝達瑪璘色布騰弟乾隆十五年襲
扎薩克一等台吉二十年卒無嗣

詔以其伯兄巴特瑪色布騰之子旺扎勒襲

二次襲旺扎勒博貝從子乾隆二十年襲扎薩克
一等台吉三十年卒子根敦扎布襲

三次襲根敦扎布旺扎勒長子乾隆三十年襲扎
薩克一等台吉四十七年

詔世襲罔替

扎薩克一等台吉阿喇布坦列傳

阿喇布坦青海和碩特人姓博爾濟吉特貝勒納

木扎勒弟康熙三十六年納木扎勒等內附阿喇
布坦幼不獲從入

觀雍正元年羅卜藏丹津叛脅誘青海諸台吉阿喇布坦
不之附三年

詔授扎薩克一等台吉乾隆四年卒子衮布喇布坦襲
一次襲衮布喇布坦阿喇布坦長子乾隆四年襲
扎薩克一等台吉四十一年卒子班第襲

二次襲班第衮布喇布坦長子乾隆四十一年襲

扎薩克一等台吉四十七年

詔世襲罔替

扎薩克一等台吉哈爾噶斯列傳

哈爾噶斯青海和碩特人姓博爾濟吉特祖色稜
哈坦巴圖爾為顧實汗弟有子十一長特爾袞號
額爾德尼琿台吉次阿哩祿克山陀音次額爾德
尼陀音次達爾瑪次多扎烏巴什次瑪賴次茂濟
喇克再傳至哈爾噶斯次庫什庫次畢喇納達什

次烏善次伊思丹津崇德八年色稜哈坦巴圖爾
來朝貢駝馬雕翎元狐等物

優賚之順治十二年阿哩祿克山陀音貢駝馬十三年瑪
賴遣使入貢十七年復偕茂濟喇克至康熙六年
伊思丹津為諸昆弟所迫了身來歸

詔封多羅貝勒尚縣主授多羅額駙

賜田產僕屬隸內蒙古正白旗後以罪削爵降三等公不
列藩部雍正元年羅卜藏丹津叛脅哈爾噶斯等

附已不之從三年

詔以哈爾噶斯為扎薩克一等台吉蓋和碩特族之游牧
青海者自顧實汗裔十九扎薩克外別設扎薩克
二一為顧實汗兄哈納克土謝圖裔以車凌納木
扎勒領之別有傳一為顧實汗弟色稜哈坦巴圖
爾裔以哈爾噶斯領之乾隆十九年卒子恭格車
凌襲

一次襲恭格車凌哈爾噶斯長子乾隆十九年襲

扎薩克一等台吉三十一年郭羅克番掠青海恭
格車凌不速調游牧兵復懼罪匿奏

詔削扎薩克仍留一等台吉以其弟垂忠扎布襲扎薩克
二次襲垂忠扎布哈爾噶斯次子乾隆三十一年
襲扎薩克一等台吉四十七年

詔世襲罔替

扎薩克一等台吉扎布列傳

扎布青海和碩特人姓博爾濟吉特扎薩克親王

察罕丹津從叔父其父巴延阿布該阿玉什為顧
實汗第四子有子十六名詳阿拉善厄魯特部傳
扎布其季也巴延阿布該阿玉什諸子分牧青海
及西套有巴圖爾額爾克濟農和囉理者游牧西
套以避噶爾丹亂先青海和碩特族內附

賜牧阿拉善授扎薩克諸昆弟子姓隸之其留處青海者
四曰扎布曰阿南達曰伊特格勒曰巴特巴康熙
三十六年從達什巴圖爾內附雍正三年

詔授扎布為扎薩克一等台吉轄其族乾隆三年卒子達

奇襲

一次襲達奇扎布長子乾隆三年襲扎薩克一等
台吉三十二年卒子桑濟達什襲

二次襲桑濟達什達奇長子乾隆三十二年襲扎
薩克一等台吉四十七年

詔世襲罔替四十九年卒子車凌多爾濟襲

三次襲車凌多爾濟桑濟達什長子乾隆四十九

年襲扎薩克一等台吉

欽定外藩蒙古回部王公表傳卷之八十七

欽定四庫全書

欽定外藩蒙古回部王公表傳卷之八十八

傳第七十二

扎薩克一等台吉察罕喇布坦列傳

察罕喇布坦青海和碩特人姓博爾濟吉特祖墨爾根諾顏為博碩克圖濟農次子父拉察布號墨爾根岱青以罪削扎薩克不立傳拉察布子三長即察罕喇布坦次旺舒克喇布坦見後傳次旺舒

克別襲察罕丹津所遺扎薩克親王爵自有傳康
熙五十年拉察布封輔國公五十五年晉固山貝
子五十九年以兵護達賴喇嘛入藏雍正元年叙
功晉多羅貝勒未幾羅卜藏丹津叛煽拉察布附
已令以兵掠察罕丹津牧二年大軍討羅卜藏丹
津拉察布懼奔巴爾喀木子察罕喇布坦旺舒克
喇布坦迎降招其父拉察布至獻駝馬千餘

詔削貝勒爵降鎮國公三年

詔宥拉察布罪授扎薩克仍領游牧衆九年土爾扈特族
諾爾布叛拉察布復附之攜察罕喇布坦由索羅
木河遁察罕喇布坦諫不從

上聞拉察布徙牧

諭悔罪歸不至副都統達爾率兵追察罕丹津遣諸台吉
助捕察罕喇布坦迎降達爾復進擊拉察布拉察
布乃悔罪自索羅木河歸青海牧

諭曰拉察布子察罕喇布坦能知其父之非不得已而從

之情甚可憫朕尚欲令察罕喇布坦襲其父拉察布公爵達爾等遵

旨議奏拉察布舊封貝勒以羅卜藏丹津叛不從青海衆赴西寧獨奔徙巴爾喀木降公爵今復無故遁應論罪如律但情因畏懼且追兵至輒降請令圈禁西寧以其子察罕喇布坦轄屬衆

諭曰拉察布係察罕丹津兄子著將拉察布寬免交察罕丹津嚴行管轄拉察布子察罕喇布坦著授扎薩克一

等台吉乾隆二年卒子多爾濟色布騰襲

一次襲多爾濟色布騰察罕喇布坦長子乾隆二
年襲扎薩克一等台吉四年卒無嗣

詔以拉察布次子旺舒克喇布坦襲

二次襲旺舒克喇布坦察罕喇布坦弟乾隆四年
襲扎薩克一等台吉三十三年卒子納罕達爾濟
襲

三次襲納罕達爾濟旺舒克喇布坦長子乾隆三

卷八十八
十三年襲扎薩克一等台吉三十六年

詔襲其從兄旺丹多爾濟帕拉木所遺扎薩克授多羅
郡王爵互見彼傳弟羅卜藏丹旌襲所遺扎薩克
一等台吉

四次襲羅卜藏丹旌旺舒克喇布坦次子乾隆三
十六年襲扎薩克一等台吉四十七年

詔世襲罔替

扎薩克一等台吉伊什多勒扎布列傳

伊什多勒扎布青海和碩特人姓博爾濟吉特扎薩克郡王額爾克巴爾珠爾次子兄朋素克旺扎勒襲扎薩克郡王爵別有傳雍正元年羅卜藏丹津叛伊什多勒扎布不之附三年

詔授扎薩克一等台吉七年卒子畢齊罕車凌襲

一次襲畢齊罕車凌伊什多勒扎布子雍正七年襲扎薩克一等台吉乾隆三十九年以病罷嗣子巴爾珠爾襲

二次襲巴爾珠爾畢齊罕車凌嗣子乾隆三十九年襲扎薩克一等台吉四十七年

詔世襲罔替

扎薩克一等台吉色布騰博碩克圖列傳

色布騰博碩克圖青海和碩特人姓博爾濟吉特父秉圖為瑚璉木什第四子秉圖子二長即色布騰博碩克圖次丹巴襲車凌敦多布扎薩克貝子爵別有傳色布騰博碩克圖初為閑散台吉雍正

元年羅卜藏丹津叛脅之附不從三年

詔授扎薩克一等台吉乾隆三年卒子車凌多爾濟襲

一次襲車凌多爾濟色布騰博碩克圖長子乾隆
三年襲扎薩克一等台吉二十六年卒子羅卜藏
車凌先卒孫巴爾珠爾襲

二次襲巴爾珠爾車凌多爾濟孫乾隆二十六年
襲扎薩克一等台吉四十二年卒子噶爾丹丹忠
襲

三次襲噶爾丹丹忠巴爾珠爾長子乾隆四十二年襲扎薩克一等台吉四十三年郭羅克番掠其

牧

上以噶爾丹丹忠甫襲爵不更事

詔宥罪免削爵四十七年

詔世襲罔替

扎薩克一等台吉車凌多爾濟列傳

車凌多爾濟青海和碩特人姓博爾濟吉特扎薩

克郡王額爾德尼額爾克托克托爾第四子雍正
三年額爾德尼額爾克托克托爾始授扎薩克

詔以其長子阿喇布濟為協理台吉九年土爾扈特族諾
爾布叛阿喇布濟有擒勦功晉授一等台吉未幾
以額爾德尼額爾克托克托爾奏

詔封其第三子索諾木丹津為長子復

諭曰朕令額爾德尼額爾克托克托爾於諸子內中選擇
可襲王爵者奏請授為長子額爾德尼額爾克托克托

爵以索諾木丹津名入奏想伊意必以阿喇布濟効力
軍前將來自能受朕恩也著將阿喇布濟晉封輔國公
已而卒額爾德尼額爾克托克托爵次子索諾木
達什嗣協理台吉阿喇布濟子多爾濟襲輔國公
乾隆十一年額爾德尼額爾克托克托爵奏請以
所屬十佐領給索諾木丹津十之六給車凌多爾
濟十之四以索諾木達什隸索諾木丹津以多爾
濟隸車凌多爾濟別設一扎薩克

允之

詔授車凌多爾濟為扎薩克一等台吉多爾濟以輔國公隸之未幾多爾濟卒子納罕扎木素降授一等台吉輔國公爵停襲故不立傳二十五年車凌多爾濟卒子恭格色布騰襲

一次襲恭格色布騰車凌多爾濟長子乾隆二十五年襲扎薩克一等台吉四十二年郭羅克番襲青海牧掠扎薩克台吉噶勒丹丹忠畜產逸走恭

格色布騰追擊之不及輒返議罪削扎薩克子沙克都爾襲

二次襲沙克都爾恭格色布騰長子乾隆四十三年襲扎薩克一等台吉四十七年

詔世襲罔替

欽定外藩蒙古回部王公表傳卷之八十八

欽定四庫全書

欽定外藩蒙古回部王公表傳卷之八十九

傳第七十三

扎薩克一等台吉索諾木喇布坦多爾濟列傳

索諾木喇布坦多爾濟青海土爾扈特人其曾祖
保蘭阿噶勒琥為貝果鄂爾勒克次子偕弟莽海
游牧青海與和碩特族錯居保蘭阿噶勒琥子車
臣諾顏生拉瑪達什號圖爾根台吉索諾木喇布

坦多爾濟其子也初青海土爾扈特族隸和碩特
雍正元年羅卜藏丹津叛有諾顏格隆者附之二
年聞大軍至乞降復從四川提督岳鍾琪勦賊事
定以習沙門法

詔宥附逆罪王大臣等議青海之土爾扈特應別設旗分
佐領令勿隸和碩特族

允之三年土爾扈特族設扎薩克四以索諾木喇布坦多
爾濟領其一

詔授扎薩克一等台吉七年卒無嗣保蘭阿噶勒琥裔自

此絕以族曾孫棟襲

一次襲棟其六世祖曰莽海為索諾木喇布坦多
爾濟從曾祖莽海子阿畢岱保齊有子二長格爾
埒圖其裔別授扎薩克見台吉色特爾布木傳次
博第蘇克為棟曾祖順治八年貢駝馬自稱青海
土爾扈特台吉十五年復遣使瑪齊克布達哩多
爾濟朋素克扎布和碩齊等入貢博第蘇克子垂

多爾濟和碩齊有子二長塔爾巴無嗣次巴坦生
子棟雍正七年襲扎薩克一等台吉乾隆五年卒
子薩喇襲

二次襲薩喇棟長子乾隆五年襲扎薩克一等
台吉三十七年卒子達什喇布坦襲

三次襲達什喇布坦薩喇長子乾隆三十七年襲
扎薩克一等台吉四十五年卒無嗣弟薩木都布
扎木素襲

四次襲薩木都布扎木素薩喇次子乾隆四十五年襲扎薩克一等台吉四十七年

詔世襲罔替

扎薩克一等台吉色特爾布木列傳

色特爾布木青海土爾扈特人扎薩克台吉棟從弟其曾祖格爾埒圖為莽海孫詳見棟傳格爾埒圖子色稜吉斯扎布有子三長臧布次伊斯拉裔不著次鄂爾齊子四長諾爾布授扎薩克

以叛誅故不立傳次即色特爾布木次衮布扎布
次拉蘇嚨扎布雍正元年羅卜藏丹津叛諾爾布
附之尋悔罪從準噶爾族貝勒色布騰扎勒來歸
亂定

詔宥罪三年

詔授諾爾布扎薩克一等台吉九年諾爾布以防準噶
爾設汛騰格里乘間叛率佐領里塔爾等盜掠
汛馬奔徙衮額爾吉庫克烏蘇時和碩特族拉察

布附諾爾布叛色特爾布木不從其兄徙牧且以
兵勦拉察布於索羅木河副都統格默爾偕輝特
公恭格和碩特台吉阿喇布濟等分道擊諾爾布
至喀喇郭勒將就擒復逸走窮追至蒙固爾托羅
海獲之

詔以色特爾布木不從逆

賜銀八百兩授扎薩克一等台吉諾爾布之就擒也詭稱
青海諸部合謀令率騰格里兵為逆且誣阿喇布

濟以青海全軍援器械至廷臣鞠上其罪稱諾爾布為土爾扈特族微台吉妄行叛逆里塔爾身為佐領附逆作亂皆應斬諾爾布叛時妻孥皆在游牧請免奴給色特爾布木轄

上從其議十三年撤防準噶爾軍

詔所部備兵二千護游牧以色特爾布木及和碩特台吉達瑪璘色布騰領之乾隆二十一年卒子烏爾占襲

一次襲烏爾占色特爾布木長子乾隆二十一年

襲扎薩克一等台吉四十七年

詔世襲罔替四十九年卒無嗣

詔以其叔父袞布扎布之子伊達木襲

二次襲伊達木烏爾占從弟乾隆四十九年襲扎

薩克一等台吉

扎薩克一等台吉達爾扎列傳

達爾扎青海土爾扈特人扎薩克台吉索諾木

喇布坦多爾濟族子其高祖翁貴為貝果鄂爾勒克弟子額濟內有子四長瑪哈斯次特穆納次青巴圖爾次庫德特皆游牧青海瑪哈斯及青巴圖爾裔不著庫德特裔詳扎薩克台吉丹忠傳特穆納子三曰墨爾根濟農額墨根無嗣曰阿玉什其孫即丹忠別授扎薩克曰阿勒達爾子二長察罕喇布坦次達爾扎察罕喇布坦以罪削扎薩克故不立傳雍正元年羅卜藏丹津叛察罕喇布坦偕和

碩特親王察罕丹津來歸復從大軍勦逆黨

諭嘉之三年

詔授察罕喇布坦扎薩克一等台吉時達爾扎授協理二等台吉九年土爾扈特族諾爾布叛和碩特族拉察布亦徙牧遁察罕喇布坦從之達爾扎留牧從副都統達爾等以兵勦逆黨拉察布尋悔罪歸察罕喇布坦不即降為達爾等所擒以狀

聞疏稱察罕喇布坦舊為土爾扈特族微台吉以不從羅

卜藏丹津叛

賜爵秩乃無故潛逃軍至又不即降應論罪如律但未
乘亂滋事請免死圈禁西寧以其弟達爾扎襲扎
薩克令佐領等不隸他族

諭曰察罕喇布坦前從勦羅卜藏丹津尚屬効力著從寬
免死其弟達爾扎著授扎薩克一等台吉以察罕喇布
坦給之令其嚴加管轄乾隆十九年達爾扎卒子色布
騰多爾濟襲

一次襲色布騰多爾濟達爾扎長子乾隆十九年襲扎薩克一等台吉三十四年卒無嗣

詔以其伯父察罕喇布坦之子袞楚克襲

二次襲袞楚克色布騰多爾濟從子乾隆三十四年襲扎薩克一等台吉四十七年

詔世襲罔替

扎薩克一等台吉丹忠列傳

丹忠青海土爾扈特人扎薩克台吉達爾扎從子

祖阿玉什為特穆納次子見達爾扎傳阿玉什子拜
博號額爾克濟農丹忠其子也號額爾德尼濟農
雍正元年羅卜藏丹津叛不之附三年

詔授扎薩克一等台吉乾隆十年卒子納木錫哩策旺襲
一次襲納木錫哩策旺丹忠子乾隆十年襲扎薩
克一等台吉十四年卒無嗣阿玉什裔自此絕以
族弟都勒瑪扎布襲

二次襲都勒瑪扎布其高祖曰庫德特為丹忠從

曾祖三傳至丹津子三長拉扎布次垂扎布皆早卒都勒瑪扎布其季也乾隆十四年

詔襲納木錫哩策旺所遺扎薩克一等台吉四十七年詔世襲罔替

欽定外藩蒙古回部王公表傳卷之八十九

欽定四庫全書

欽定外藩蒙古回部王公表傳卷之九十

傳第七十四

公中扎薩克一等台吉車凌納木扎勒列傳

車凌納木扎勒青海和碩特人姓博爾濟吉特其
高祖哈納克土謝圖為顧實汗伯兄有子二長秉
圖達賴烏巴什次洪果爾秉圖達賴烏巴什子二
長圖瑚爾綽克圖次墨爾根瑪拉蓋自哈納克土

謝圖祖博貝密爾咱始稱衛拉特汗越四傳至圖
瑚爾綽克圖皆世為長嗣圖瑚爾綽克圖子四長
塔爾巴額爾克次達木巴達爾濟次僧格子即車
凌納木扎勒次扎木揚康熙三十六年哈納克土
謝圖裔從達什巴圖爾內附雍正元年羅卜藏丹
津叛脅車凌納木扎勒等附之不從賊黨掠其牧
以兵拒弗敵集昆弟子姓來歸自編屬丁為佐領
二年青海定

遣歸牧三年設公中扎薩克二猶滿洲蒙古八旗之公中
佐領也其一為喀爾喀族別有傳其一即和碩特
族凡三十三台吉

詔以車凌納木扎勒領之授一等台吉八年準噶爾掠其
牧

上憫之

詔攜戚屬居京師十年卒無嗣

詔以其伯父達木巴達爾濟之子巴勒丹襲

一次襲巴勒丹車凌納木扎勒從弟初授二等台吉以準噶爾侵牧失其孥孑身赴

京師

詔優養之雍正十一年襲公中扎薩克一等台吉

遣歸青海牧乾隆二十九年卒子達什車木伯勒襲

二次襲達什車木伯勒巴勒丹長子乾隆二十九

年襲公中扎薩克一等台吉四十七年

詔青海諸扎薩克咸世襲罔替惟車凌納木扎勒及喀

爾喀達什敦多布所遺扎薩克仍以公中議襲

公中扎薩克一等台吉達什敦多布列傳

達什敦多布青海喀爾喀人姓博爾濟吉特喀爾
喀祖格埒森扎扎賚爾琿台吉有子七名詳喀爾
喀部傳鄂特歡諾顏其季也子青達瑪尼默濟克
號車臣諾顏有子二長唐古特墨爾根岱青三傳
至通謨克授扎薩克輔國公隸喀爾喀扎薩克圖
汗部別有傳次多爾濟阿喇布坦伊勒登徒牧青

海子訥克額爾德尼阿海生達什敦多布不復歸喀爾喀部喀爾喀與和碩特同祖故喀爾喀族之徙牧青海者皆隸和碩特族雍正元年和碩特羅卜藏丹津叛脅青海喀爾喀諸台吉附已有根敦者訥克額爾德尼阿海從子也二年間大軍至迎降王大臣等議青海之喀爾喀請別設旗分佐領令勿隸和碩特族

允之三年

詔喀爾喀族設公中扎薩克一以根敦領之授一等台吉
青海厄魯特凡五族設公中扎薩克二一為和碩
特族自車凌納木扎勒始別有傳一為喀爾喀族
自根敦始未幾以根敦嗜酒且與喀爾喀諸台吉
隙不任扎薩克職罷之故不立傳先是噶爾丹侵
喀爾喀根敦從多爾濟阿喇布坦伊勒登攜孥奔
青海唐古特墨爾根岱青及子本塔爾岱青巴圖
爾前卒孫墨德卓哩克圖亦以避難從至後噶爾

丹就滅乞由青海還喀爾喀因

賜牧阿爾台額爾齊斯烏隴貴界餘仍留處青海墨德卓
哩克圖卒子通謨克嗣至是

詔根敦自青海往附之乾隆三年

上以喀爾喀族聚青海不忍令析處

詔簡台吉領之以達什敦多布任公中扎薩克一等台


吉四十年卒子羅卜藏車木丕勒先卒孫車德爾

襲

一次襲車德爾達什敦多布孫乾隆四十二年襲

公中扎薩克一等台吉四十七年

詔仍世以公中議襲



欽定四庫全書

欽定外藩蒙古回部王公表傳卷之九十

欽定外藩蒙古回部王公表傳卷之九十

欽定四庫全書

史部

欽定外藩蒙古回部王公表傳卷九十一至四

主事_臣陳若霖覆校

總校官編修_臣倉聖脉

欽定四庫全書

欽定外藩蒙古回部王公表傳卷之九十一

傳第七十五

西藏總傳

西藏即唐古特別稱土伯特至

京師萬四千餘里東界四川西界大沙海南界雲南

北界青海東西距六千四百餘里南北距六千五

百餘里凡四部曰衛曰藏曰喀木曰阿里轄城六

十餘衛在四川打箭爐西北諺稱前藏其首城曰
拉薩藏在衛西南諺稱後藏其首城曰日喀紫喀
木在衛東南其首城曰巴塘阿里居藏極西有城
曰達克喇距岡底斯山三百餘里西南徼地漸高
至岡底斯山而極其西北有僧格喀木布諸山亘
阿里北二千餘里入喀齊部諸境東北有諾穆汗烏
巴什諸山環衛地達西寧凡六千餘里西南有們
那克尼爾諸山亘阿里南二千餘里入額訥特珂

克境額訥特珂克即古天竺國也東南有達木楚
克喀木布諸山亘藏衛達喀木凡七千餘里禹貢
曰導黑水至于三危衛藏喀木統為三危喀拉
烏蘇經其地入海蒙古謂黑曰喀拉謂水曰烏蘇
在唐宋為吐蕃元明即烏斯藏地俗喜浮屠法設
紅黃二教以冠別尤重黃教達賴喇嘛班禪喇嘛
掌之代理藏務者曰噶卜倫次曰代奔次曰西爾
奔次曰尚卓特巴分理兵刑財賦其治民者曰宗

奔戶五出兵一賦納達賴喇嘛市打箭爐地貢道
由西寧入達賴喇嘛班禪喇嘛使稱堪布噶卜倫
使稱囊素喀拉烏蘇設堪布喇嘛一穆魯烏蘇設
蒙古宰桑一司郵務唐古特西南布魯克巴拉達
克巴勒布諸國道遠不自至因達賴喇嘛納貢達
賴喇嘛居拉薩曰布達拉布達拉與普陀音近普
陀山有三一在浙江定海縣一在額訥特珂克之
南海一在唐古特即達賴喇嘛居別有伊克昭巴

罕昭相傳布達拉為吐蕃贊普建牙所伊克昭為
唐文成公主建巴罕昭為吐蕃妻他國女建今猶
存唐長慶中與吐蕃定盟碑及文成公主所事佛
像班禪喇嘛居日喀紫曰扎什倫布唐古特謂如
來相曰昭大曰伊克小曰巴罕福壽曰扎什須彌
曰倫布以示慶也達賴喇嘛班禪喇嘛明宗喀巴
二大弟子宗喀巴興黃教弟子數千人達賴喇嘛
位居首其名曰羅倫嘉穆錯說者謂羅倫嘉穆錯

而前行教額訥特珂克巴勒布唐古特諸境凡五十一世率荒邈難稽自羅倫嘉穆錯而後世以化身掌黃教一世曰根敦珠巴二世曰根敦嘉穆錯始立第巴代理所部事三世曰索諾木嘉穆錯即明時所稱活佛鎖南堅錯也明懲唐吐蕃亂思制御之永樂中封番僧為大寶法王大乘法王大慈法王闡教王顯教王化教王贊善王護教王凡八王並給敕印成化中大寶法王來朝遣內監以鹵簿送之不

達而返索諾木嘉穆錯時諸番僧莫不俯首稱弟子四世曰雲丹嘉穆錯五世曰阿旺羅卜藏嘉穆錯即所稱第五輩達賴喇嘛也喀爾喀及厄魯特部長敬禮之有藏巴者為唐古特汗居日喀紫第巴奉達賴喇嘛居拉薩不相能

本朝崇德二年喀爾喀三汗奏請

發帑使延達賴喇嘛四年厄魯特繼至因

賜書達賴喇嘛五年

遣使往以喀爾喀有違言不果七年達賴喇嘛班禪喇嘛
偕藏巴及厄魯特顧實汗遣使貢方物達

盛京表稱

曼珠師利大皇帝義取文殊佛號且切音與滿洲近也今
歲獻丹書表如之使至

賜宴

命諸王貝勒宴如次留八閱月八年
遣使存問達賴喇嘛稱金剛大士復

賜書班禪喇嘛給銀幣器物有差會第巴乞兵厄魯特稱
藏巴虐部衆幾釋教顧實汗自青海擊之事
聞

賜敕顧實汗復

諭藏巴曰爾稱佛法護國遣使上書邇聞為厄魯特所
敗特賜函緘嗣當修好勿絕藏巴尋為顧實汗所戕初
藏衛及青海巴爾喀木皆隸唐古特顧實汗襲青
海據之令巴爾喀木納賦復侵藏衛陽崇釋教陰

自強給地達賴喇嘛班禪喇嘛遣長子達延轄其
衆號鄂齊爾汗第六子多爾濟佐之號達賴巴圖
爾台吉順治三年達賴喇嘛顧實汗各遣使貢金
佛念珠

賚甲冑弓矢皮幣四年達賴喇嘛班禪喇嘛表頌

功德獻方物五年烏斯藏闡化王遣僧索諾穆拉什來貢
賜妙勝慧智灌頂國師號是年

遣使召達賴喇嘛明年歲在寅達賴喇嘛奏俟辰年入

覲九年壬辰正月達賴喇嘛以行期

聞鄂齊爾汗使從

遣官迎

詔定正副貢使賞例十二月達賴喇嘛入

覲獻方物

賜宴南苑

詔建黃寺居之是年明烏斯藏暨長河西魚通寧遠董卜

韓胡諸指揮宣慰司獻敕印請內附十年正月

賜宴達賴喇嘛於

太和殿

賚金幣鞍馬二月

詔和碩親王碩塞率八旗兵送至岱汗四月

遣官齎金冊印封為西天大善自在佛領天下釋教普通

鄂齊賴達喇達賴喇嘛十三年闡化王遣僧嘉穆錯諾爾布等貢方物先是索諾穆拉什至

詔闡化王納明所給敕印比年凡四遣使至是獻舊玉印

一及敕書稱闡化王舊為土伯特國主藏巴襲之
顧實汗戕藏巴以闡化王歸達賴喇嘛轉給第巴
第巴因有闡化王敕印詭遣邊內安島人稱闡化
王貢使

詔改授闡化王敕印復

賜書達賴喇嘛詰第巴罪十七年達賴喇嘛班禪喇嘛鄂
齊爾汗表貢方物

遣官存問

賚雕鞍玉壺等物十八年達賴喇嘛請市茶北勝州

允之康熙九年鄂齊爾汗卒

賜賻祭子朋素克嗣號達賴汗十四年達賴喇嘛遣使代

逆藩吳三桂乞降

敕曰吳三桂初叛時朕遣使往諭喇嘛大兵分路進剿若吳三桂竄赴唐古特當即擒獻喇嘛奏稱吳三桂曾取延打木結達木二城乃三噶爾瑪地今既發兵攻取防守沿邊若欲徵兵深入惟候詔旨達賴巴圖爾台吉已自唐

古特遣赴青海令其有事相援無事則鈐東部衆朕思
喇嘛崇尚信義必如所奏而行因以青海蒙古進兵故
傳諭滇蜀二省達賴巴圖爾台吉辭松潘路險未即赴
喇嘛又奏稱蒙古兵雖強得城池恐貪據且西南地熱
風土不宜若吳三桂勢窮悔罪乞免死允降吳三桂背
恩謀逆罪不容誅朕豈容伊為裂土罷兵請又靖逆將
軍張勇等奏稱青海蒙古入邊侵擾益以叛鎮王輔臣
倡亂寧羌故也今西陲已晏然無事喇嘛宜恪守前言

令達賴巴圖爾台吉等統轄部衆毋得滋事擾民二十
二年達賴喇嘛示寂第巴匿不奏嗣是殘喀爾喀
及噶爾丹就滅皆第巴為之噶爾丹幼棄家依達
賴喇嘛後歸準噶爾詭言達賴喇嘛授已博碩克
圖汗號以所居阿爾台鄰喀爾喀牧謀侵之未幾
喀爾喀右翼扎薩克圖汗成衮與左翼土謝圖汗
察琿多爾濟構釁達賴喇嘛遣扎爾布奈定盟
察琿多爾濟不從成衮子沙喇愬於

朝

敕達賴喇嘛擇使善輯喀爾喀達賴喇嘛奏唐古特以噶
爾丹西勒圖為尊遣之往蒙古謂喇嘛坐牀者為
西勒圖蓋喇嘛大弟子也而喀爾喀哲卜尊丹巴
呼圖克圖亦奉

詔赴盟壇與議哲卜尊丹巴呼圖克圖者土謝圖汗弟也
偕噶爾丹西勒圖集喀爾喀兩翼汗濟農諾顏台
吉宣

諭定盟噶爾丹偵哲卜尊丹巴呼圖克圖與噶爾丹西勒圖並坐詰責之因構兵土謝圖汗不敵偕哲卜尊丹巴呼圖克圖挈部內附

上以喀爾喀厄魯特奉達賴喇嘛教

申命遣使罷兵第巴煽噶爾丹侵喀爾喀索哲卜尊丹巴呼圖克圖二十九年詭為達賴喇嘛表偕唐古特厄魯特汗台吉請上

尊號

諭曰朕聞喀爾喀部兄弟不睦遣使達賴喇嘛諭令兩翼
歸好達賴喇嘛遣噶爾丹西勒圖往不能仰體朕心及
達賴喇嘛意雖已和喀爾喀而喀爾喀與厄魯特相仇
之故實從此起後聞交惡興戎即遣使達賴喇嘛所達
賴喇嘛遣齊緝克塔賴堪布等往卒不能諭止之聽其
縱戰喀爾喀為所敗朕復遣使達賴喇嘛所諭令定盟
息兵達賴喇嘛遣濟隆呼圖克圖朕遣伊拉古克三呼
圖克圖往說之詎意伊等不行諭止反令闌入邊汛朕

出兵問罪伊等立視其戰我軍不得已而擊之致厄魯
特敗遁朕與達賴喇嘛期於撫育衆生而使臣故違意
旨至於如此如能令厄魯特與喀爾喀修好朕尚欲加
達賴喇嘛嘉號此皆任事行人不能仰副朕心及達賴
喇嘛意致喀爾喀殘破厄魯特喪敗朕心實為隱痛復
何尊號之可受乎其以是諭達賴喇嘛及諸汗台吉等
來使貢物著並發還三十年以收撫喀爾喀全部

諭達賴喇嘛知之三十二年達賴喇嘛使至有巴圖爾額

爾克濟農和囉理者青海和碩特族也游牧西套
避噶爾丹侵來歸

賜居阿拉善尋叛復悔罪至策妄阿喇布坦為噶爾丹從
子修怨噶爾丹第巴忌之奏和囉理安置青海保
無盜賊虞厄魯特衆半附策妄阿喇布坦若生亂
端何以禦之唐古特舊市打箭爐請勿禁聽內地
民與蒙古互市

敕曰和囉理以困窮來歸朕優恤之使居阿拉善乃忘朕

恭養恩妄生猜疑奔竄他所今窮而復歸朕復宥罪安
置并無欲得其利欲用其力之心也今爾欲和囉理游
牧青海何不即遣人遷往爾又言策妄阿喇布坦恐生
亂端目前並無妄為之事苟有此等事端其時自當從
公裁度爾又奏打箭爐交市之事殆欲屯戍意也爾與
朕一道同風歷年已久如爾設立駐防朕必量增戍卒
況我內地兵丁約束甚嚴未嘗私出邊境爾但嚴禁屬
衆戍兵之設可無用也達賴喇嘛尋奏年邁事皆決第

巴請給之爵

詔封第巴為土伯特國王以達賴喇嘛辭異前奏遣使往察不得狀三十四年

諭召班禪喇嘛來朝第巴與噶爾丹陰阻之明年班禪喇嘛使至稱避痘達賴汗奏貽書勸赴

召不之從會

上親征噶爾丹俘降衆得第巴奸狀

諭達賴喇嘛班禪喇嘛知之復

敕瑛達賴汗曰爾自顧實汗以來與本朝和協同心專尚
宗喀巴道至汗身益誠信不渝頃噶爾丹陽護宗喀巴
法陰為悖逆邪行朕親統大兵勦滅之第巴乃達賴喇
嘛下司事之人反不遵達賴喇嘛教惟爾汗敬待朕使
預以噶爾丹事奏聞朕知爾不忘舊好甚堅且專凡悖
壞教法煽誘噶爾丹者爾汗殆知之特遣使往以示褒
善貶惡之意

敕責第巴曰爾陽奉宗喀巴教陰與噶爾丹比以久故之

達賴喇嘛詐為尚存遣濟隆呼圖克圖至噶爾丹所烏
蘭布通之役為擇戰日朕遣人往召班禪喇嘛爾又謂
噶爾丹將要殺之不遣行青海博碩克圖濟農與噶爾
丹結婚又不舉發爾果能改過仍思遵宗喀巴道奏明
達賴喇嘛已故始末尊奉班禪喇嘛使赴朕名執獻濟
隆呼圖克圖及博碩克圖濟農子所娶噶爾丹女朕仍
待汝以尊崇禮不然朕必問爾欺達賴喇嘛助噶爾丹
罪爾向對朕使言四厄魯特為爾護法主爾其名四厄

魯特助汝朕將觀何如也三十六年第巴疏詭稱達賴喇嘛存令其使尼麻唐呼圖克圖密奏達賴喇嘛示寂恐唐古特生變故隱期今第六世靜體已十五年乞

念唐古特衆勿遽宣

遣理藩院主事保住等齎

敕諭曰朕數年來久知達賴喇嘛已故今爾輸誠密奏朕不欲摘發隱私傾人家國嗣當益加恭順勿違朕旨保

住等行我使自策妄阿喇布坦所歸言西北諸厄
魯特知達賴喇嘛示寂久第巴阻策妄阿喇布坦
兵令勿勦噶爾丹復煽青海諸台吉私盟

詔保住等視新達賴喇嘛嚴訐第巴罪第巴奏策妄阿喇
布坦自撤兵非臣阻青海諸台吉懼噶爾丹侵備
兵盟第六世達賴喇嘛尚坐禪濟隆呼圖克圖請
勿壞身命班禪喇嘛將赴召噶爾丹女乞仍給博
碩克圖濟農子

賜敕詰責濟隆呼圖克圖尋械至禁之班禪喇嘛奏學淺
不敢赴召博碩克圖濟農子察罕丹津奏請免獻
噶爾丹女乃

允之是年達賴汗遣使慶征噶爾丹捷子拉藏以建達賴
喇嘛塔故赴青海聞

上招撫使至偕諸台吉內附達賴汗卒拉藏嗣第巴惡
之初第巴與策妄阿喇布坦讐噶爾丹既滅第巴
策妄阿喇布坦畏

天朝威各卑詞乞命然皆貌恭順懷不靖志策妄阿喇布
坦詭遣使赴青海聲言兵擊第巴秦第巴壞宗門
教禁班禪喇嘛偽立達賴喇嘛名羅卜藏琳沁策
旺嘉穆錯者惑諸蒙古恐將滋變

上燭其奸

諭廷臣曰策妄阿喇布坦由博囉塔拉至土伯特必經喀
拉烏蘇等處路徑險惡斷不能往欲悉衆大舉則附近
哈薩克布魯特諸部相仇殺無留護妻孥者若兵單力

弱斷難成事惟有奮激而行妻孥與俱幸濟則已否則
有歸附土伯特之謀耳其意特張虛聲欲觀青海動靜
未必果欲爭戰也策妄阿喇布坦果寢兵第巴計毒拉
藏不死以兵逐拉藏因集唐古特衆執殺第巴奏
至

敕封輔教恭順汗

諭獻第巴所立達賴喇嘛使至策妄阿喇布坦遣人往迎
拉藏不予復不以獻

諭曰達賴喇嘛存日六十年來塞外不生一事及身故後
第巴誘噶爾丹妄行不靖朕觀奏詞非復昔日語氣遣
使細訪乃盡得欺詐狀蒙古素崇佛教有達賴喇嘛名
皆皈嚮之倘為策妄阿喇布坦所迎歸則西藏蒙古皆
向策妄阿喇布坦矣拉藏今雖不從朕命後必執之來
獻四十六年拉藏汗獻第巴所立達賴喇嘛羅卜藏琳
沁策旺嘉穆錯道死復立博克達之阿旺伊什嘉
穆錯為達賴喇嘛青海諸台吉以不辨真偽爭

詔遣官往視拉藏汗奏以班禪喇嘛言置禪榻王大臣等
議拉藏汗與青海諸台吉隙請遣官理藏務

詔侍郎赫壽往四十九年班禪喇嘛拉藏汗奏阿旺伊什
嘉穆錯諳經典青海諸台吉信之請給冊印

詔封第六世達賴喇嘛撤赫壽歸青海諸台吉訐拉藏汗
辭誣以裏塘之羅卜藏噶勒藏嘉穆錯為真達賴
喇嘛瑚畢勒罕

詔詢班禪喇嘛如拉藏汗言青海諸台吉復固爭

上以不輯之將構難

遣官檄集盟壇示班禪喇嘛印文

諭徙羅卜藏噶勒藏嘉穆錯置內地青海貝勒察罕丹
津台吉羅卜藏丹津等稱避痘不宜遠行初議
送紅山寺繼請送西寧宗喀巴寺卒不遣且以兵
脅異已者

詔大軍備之乃懼送羅卜藏噶勒藏嘉穆錯至宗喀巴寺
五十六年偵準噶爾潛兵赴藏

詔赫壽遺書拉藏汗曰將軍富寧安等擒準噶爾哨卒言
拉藏汗子娶策妄阿喇布坦女已三年且生子策
妄阿喇布坦遣其將策凌敦多卜及托卜齊都噶
爾三都克等率兵往阿里克或策妄阿喇布坦侵
藏地或爾欲侵青海導策妄阿喇布坦兵至俱未
可定爾既受我

主封食我

主祿而侵我邊部我川兵三萬餘豈有聽爾臨諾穆汗烏

巴什穆魯烏蘇境侵青海之理乎彼時助察罕丹
津等與爾戰悔無及矣蓋拉藏汗自仇殺第巴後
使貢不絕策妄阿喇布坦忌之語哲卜尊丹巴呼
圖克圖使拉藏汗嗜酒無謀詭議姻拉藏汗子三
長噶爾丹丹忠次索爾扎次色布騰策妄阿喇布
坦以女博托洛克為噶爾丹丹忠婦來娶留不遣

上聞之

諭歸拉藏汗子不從西域謂善巫蠱者曰鮚答噶爾丹丹

忠習其術策妄阿喇布坦誘縛之夾兩釜間烙死
遣兵六千襲藏詭稱送噶爾丹丹忠及博托洛克
歸拉藏汗前以爭達賴喇嘛與青海諸台吉違言
事甫定準噶爾兵赴藏

上疑之或拉藏汗煽策妄阿喇布坦構兵也青海尋以準
噶爾侵拉藏汗告

詔荊州太原駐防兵赴成都西安以署西安將軍額倫特
屯西寧都統和禮屯雲南護軍統領溫布屯打箭

爐侍衛色楞宣

諭青海諸台吉備兵時策凌敦多卜率準噶爾衆由特幾
斯踰淨科爾庭山拉藏汗不之備賊至達木始覺
偕子索爾扎拒不敵奔守布達拉遣使齎疏乞援
賊誘噶卜倫沙克都爾扎卜唐古特台吉納木扎
勒等開布達拉門入戕拉藏汗拘色布騰及宰桑
等禁阿旺伊什嘉穆錯於扎克布里廟索爾扎率
兵三十餘潰走為所擒其妻間道來奔

詔安置博羅克克優養之明年拉藏汗疏始至

詔額倫特色楞往援失利從兵或為準噶爾所掠策凌敦
多卜復誘裏塘營官喇嘛等赴藏裏塘外曰巴塘
而察木多而乍雅而巴爾喀木皆距近五十八年
都統法喇奉

詔屯打箭爐以裏塘第巴色布騰阿住達瓦喇木扎木巴
等抗不就撫誅之傳檄巴塘察木多乍雅各籍其
土及民數復

詔自打箭爐進屯巴塘策凌敦多卜懼送所掠兵自巴
爾喀木歸言唐古特時有瘴準噶爾難久處羅卜
藏噶勒藏嘉穆錯唐古特衆僉稱為真達賴喇嘛若
置禪榻善甚

命撫遠大將軍固山貝子允禔宣

諭青海台吉等從大軍入藏羅卜藏噶勒藏嘉穆錯奏
隨地可置禪榻興大兵恐擾衆王大臣等以藏地
遠且險不決進兵議五十九年

諭曰策凌敦多卜聞我師至自必望風遠遁俟定立法教
後或暫留兵守視或久鎮其地唐古特衆皆如我兵準
噶爾至以逸待勞何難勦滅西寧至四川雲南境外土
番錯處西藏皆土番族若策凌敦多卜侵據藏地唐古
特衆即為準噶爾兵邊疆土番復安能保全耶喀爾喀
及青海俱服朕風化準噶爾乃侵據藏地青海台吉理
應棄命忘身乃口稱維持黃教之實心効力人朕思策
凌敦多卜兵遠道衝雪尚能至藏我兵獨不能赴乎此

時若不安藏賊益無所忌憚安藏大兵決宜前進

詔封羅卜藏噶勒藏嘉穆錯為宏法覺衆第六世達賴喇

嘛

賜金冊印以護軍統領噶爾弼為定西將軍都統延信為
平逆將軍率青海及內扎薩克喀爾喀阿拉善兵
護達賴喇嘛行噶爾弼自拉里進擊準噶爾宰桑
春丕勒於章來爾戎抵墨朱工喀第巴達克咱喇
嘛鍾科爾等迎降集皮船渡宣

諭大小第巴及各寺喇嘛封達賴喇嘛倉庫斷賊糧道誅
所置喇嘛總管等延信自青海進敗準噶爾於卜
克河齊諾郭勒綽瑪喇賊由克勒底雅遁軍抵藏
出阿旺伊什嘉穆錯於禁所廢之蓋自第五世達
賴喇嘛示寂後幾四十年第六世達賴喇嘛始定
先是準噶爾賊未至藏

遣理藩院主事勝住喇嘛楚爾沁藏布喇木占巴等往圖
地域至是大兵入諸番內附

上以山川名號省漢異稱

命大學士九卿等詳考西南徼外輿地六十年

御製平定西藏文碑建伊克昭

文曰昔者

太宗文皇帝崇德七年班禪額爾德尼達賴喇嘛顧實汗
謂東土有

聖人出特遣使自人跡不至之區經仇敵之國閱數年始
達盛京至今八十載同行善事俱為施主頗極安寧後

達賴喇嘛之歿第巴隱匿不奏者十有六年任意妄行
拉藏滅之復興其法因而允從拉藏青海羣衆公同之
請中間策妄阿喇布坦妄生事端動準噶爾之衆肆行
奸詐滅壞達賴喇嘛并廢第五輩達賴喇嘛之塔辱鯁
班禪毀壞寺廟殺戮喇嘛名為興法而實滅之且欲竊
據土伯特國朕以其所為非法爰命皇子允禔為大將
軍又遣朕子孫等調發滿洲蒙古綠旗兵各數萬歷烟
瘴之地士馬安然而至賊衆三次乘夜盜營我兵奮力

擊殺賊皆喪膽遠遁一矢不發平定西藏振興法教賜
今瑚畢勒罕冊印封為第六輩達賴喇嘛安置禪榻撫
綏土伯特僧俗人衆各復生業於是文武臣工咸謂王
師西討歷瘴癘險遠之區曾未半載輒建殊勲實從古
所未有而諸蒙古部落及土伯特酋長亦合詞奏曰皇
帝勇畧神武超越往代天兵所臨邪魔掃蕩復興蒙古
向所尊奉法教喀木藏衛等部人衆咸得技離湯火樂
土安居如此盛德大業非臣下頌揚所能宣罄請賜御

製碑文鐫勒昭地以垂永久朕何功焉而羣衆勤請不
已爰紀斯文立石西藏俾中外知達賴喇嘛等三朝恭
順之誠諸部落累世崇奉法教之意朕之此舉所以除逆撫
順綏衆興教云爾雍正元年

詔給第六世達賴喇嘛冊印文視第五世達賴
喇嘛別

賜敕司噶卜倫務二年大軍討青海叛賊羅卜藏丹津誅
助逆喇嘛等

諭曰喇嘛助羅卜藏丹津為逆糾數千餘衆抗拒官軍以致追勦覆滅玷辱法教甚矣前準噶爾據唐古特戮僧徒燬寺廟大軍往討之恢復昭地法教振興如此隆恩不知感激反助悖逆尚可謂遵奉法教者乎其以此諭喇嘛等知之三年川陝總督岳鍾琪奏打箭爐外裏塘巴塘乍雅察木多中甸請隸內地給頭目等土司職察木多外魯隆宗雜哇坐爾剛桑噶吹宗衮卓諸部距打箭爐遠內地遙制不便請隸唐古特以

噶卜倫康濟鼐阿爾布巴理之

遣副都統鄂齊往

諭達賴喇嘛蓋自大軍定藏亂以第巴康濟鼐阿爾布巴
隆布鼐頗羅鼐等迎降功

詔封康濟鼐阿爾布巴固山貝子隆布鼐輔國公理前藏
務頗羅鼐扎薩克一等台吉理後藏務各授噶卜
倫四年鄂齊奏達賴喇嘛幼康濟鼐恃績蔑視諸
噶卜倫阿爾布巴隆布鼐等陰險黨扎爾鼐附之

恐構達賴喇嘛與康濟鼐不睦請罷隆布鼐扎爾
鼐翦阿爾布巴翼

諭達賴喇嘛偕康濟鼐阿爾布巴和衷復

詔設駐藏大臣以副都統瑪拉內閣學士僧格往五年瑪
拉等至藏阿爾布巴隆布鼐扎爾鼐殺康濟鼐叛
遣賊黨侵阿里頗羅鼐集後藏兵拒賊却走將往
擊之馳奏乞援

詔左都御史查郎阿率兵萬五千餘赴藏六年頗羅鼐謀

大軍將至集後藏及阿里兵九千自潘玉口馳赴
前藏聞瑪拉等駐拉薩護達賴喇嘛遣兵助召諸
寺喇嘛擒阿爾布巴隆布爾扎爾爾等送瑪拉所
查郎阿至誅阿爾布巴等及其孥請留兵二千駐
藏徙達賴喇嘛居裏塘

允之以頗羅萬領後藏務轄阿里岡底斯境

諭給銀三萬賞從兵查郎阿將撤大軍還奏舊設噶卜倫
理前藏務今藏地初定頗羅萬為衆服請令兼領

前藏從之

諭曰前用兵西藏時頗羅鵒甚為効力其後噶卜倫等嫉妬爭權阿爾布巴隆布鵒等潛結匪類公然肆惡擅殺朝廷敕封貝子總理事務之康濟鵒並欲害及頗羅鵒頗羅鵒奏聞逆黨罪狀朕遣大臣領兵前往察詢情由分別治罪頗羅鵒聞大軍將至率衆奮勇前馳直抵藏地阿爾布巴等力屈勢窮被各寺喇嘛擒獻大臣至彼盡得悖逆妄亂之情已將阿爾布巴及叛逆等盡行殲

卷九十二
誅自此黃教可興番衆可輯頗羅萬深知大義討逆鋤
奸俾無辜受害者得雪沈寃背惡肆行者早正刑辟甚
屬可嘉著封為固山貝子以獎義勇以昭國憲明年達

賴喇嘛至裏塘

詔建噶達寺居之岳鍾琪奏移化林兵五百往護復以兵
四百屯噶達西吹音堡及鴉籠江上中下三渡尋
徙泰寧四川總督黃廷桂奏泰寧距打箭爐道險
舊屯兵五百不給防禦請增兵如數令與西藏裏

塘巴塘互犄角從之大軍之討阿爾布巴也噶爾丹策凌使至奏請赴藏煎茶

上不允以準噶爾覬唐古特將不靖七年

遣兵討準噶爾

諭曰策妄阿喇布坦假黃教為名潛兵入藏無故殺拉藏汗遣使往討復敢阻兵抗命其後策妄阿喇布坦身故子噶爾丹策凌遣使至奏稱欲使衆生樂業黃教振興噶爾丹策凌不過一微末台吉此豈伊應出語耶且西

藏阿爾布巴隆布爾扎爾爾等濟惡同謀皆以準噶爾
隣伊地青海叛賊羅卜藏丹津係伊等姻戚彼此相依
窘迫時必往投之頗羅爾勇往直前截賊去路阿爾布
巴等未得前進輒被擒準噶爾若仍留游牧將來青海
及西藏地必受其害此朕所熟思而審處者也明年僧

格偕頗羅爾以兵千五百屯騰格里諾爾防準噶
爾九年布魯克巴部諾顏琳臣齊壘喇布濟喇嘛
扎爾西里布魯克爾濟噶碧棟魯布等納貢

諭曰朕為天下主一視同仁無分中外乃者附近帕爾城之布魯克巴人等起釁構兵互相讐殺朕聞之甚不忍頗羅鴈仰體朕意與班禪喇嘛遣使往諭朝廷恩德布魯克巴人等感悟息爭敬順無違且請施恩訓誨朕甚嘉悅嗣此恪守疆界共相和睦永遵釋教祇奉恩綸朕自益加優眷復以頗羅鴈招撫功

詔晉封多羅貝勒總理衛藏噶卜倫務

賜敕印班禪喇嘛尋偕頗羅鴈助駐藏軍糧瑪拉却之復

固請

詔給如值以軍餉足不煩獻助宣

諭先是準噶爾掠索爾扎色布騰禁之哲卜尊丹巴呼圖
克圖說策妄阿喇布坦獻謝罪不從子噶爾丹策
凌嗣給索爾扎戶十詭稱將遣歸唐古特頗羅鴈
聞之以告

諭曰準噶爾戕拉藏汗掠其子索爾扎等歸今稱遣還西
藏不可不嚴為防備前策妄阿喇布坦遣策凌敦多卜

襲西藏時誑稱噶爾丹丹忠偕其女歸乘拉藏汗不備襲唐古特地今遣歸索爾扎之言正噶爾丹策凌奸計若唐古特少為玩忽即蹈前策凌敦多卜故轍矣準噶爾既殺拉藏汗豈肯令其子索爾扎歸藏襲爵唐古特現有訓練蒙古兵爾其與駐藏大臣等定議設汛阿里哲斯肯圖魯克勒底雅等處協力防禦準噶爾若以兵隨索爾扎至可即迎擊之索爾扎父兄被人殺害焉有不忿恨之理若果思報仇感戴朕恩率屬來歸爾等自

可悉心安頓至若立汗之事當令達賴喇嘛班禪喇嘛
奏聞於朕方可建之豈可令噶爾丹策凌任意妄行久
之索爾扎不至後大軍定準噶爾色布騰及索爾
扎子納噶察始來歸附牧察哈爾旗十年拉達克
汗德忠納木扎勒奏臣理國事尊釋教偵準噶爾
情輒以告乞

賜恩綸

敕曰爾父尼瑪納木扎勒偕貝子康濟鼐同心報効前已

大沛恩膏今爾亦效爾父與貝勒頗羅鼐一體効力甚
屬勤勞嗣當益加黽勉以紹前徽僧格復奏巴勒布部

雅木布車稜庫庫木三汗慕

聖德遣貢請

覲

上憫其道遠

敕曰爾汗慕朕仁化萬里輸誠朕甚嘉悅納所進方物第
念道路遙遠往返維艱爾使即由西藏遣歸爾汗但與

貝勒頗羅萬協力和衷維持黃教以副朕普育羣生至
意十一年

諭曰西藏駐劄弁兵本為保護唐古特衆防範準噶爾設
比來賊衆敗竄不能復涉藏地頗羅萬抒誠効力唐古
特兵皆訓練壯勇目今藏地無事兵丁多集米穀錢糧雖
給自內地唐古特不無解送勞著量留守藏兵五百餘
盡撤還前令達賴喇嘛移駐泰寧因唐古特有阿爾布
巴等事恐準噶爾乘間來犯其從至弟子久違鄉土各

懷歸志班禪喇嘛現復年邁有疾著仍遣達賴喇嘛歸藏乾隆元年布魯克巴部諾顏琳臣齊壘喇布濟等奉表貢三年拉達克汗遣獻方物各

賜敕獎四年駐藏副都統杭奕祿奏巴勒布三汗邇構兵臣遣頗羅鼐諭輯之咸聽命獻所部民數

詔優賚復以頗羅鼐績晉封多羅郡王噶爾丹策凌尋請赴藏煎茶

諭曰朕為天下大君不阻奉教之人爾準噶爾前曾潛

往藏地擾害土伯特衆今若徑赴彼地土伯特或懷
憤滋事爾果誠心布施朕當遣兵護往既而準噶爾
煎茶使道棟科爾以爭市值不果往

詔責違信罪噶爾丹策凌遣謝固申前請

允之八年準噶爾使至藏謂頗羅鼐曰聞拉達克言土
伯特黃教盛今信然噶勒招穆倫河濱舊設溫都
遜喇嘛禪榻噶爾丹策凌乞代葺準噶爾之詣經
典喇嘛乞給我攜歸聞唐古特不善騎且乏軍械

今觀之武備稍勝頗羅酋語之曰

大皇帝闡黃教輯衆生以故土伯特富庶甚爾等至藏
煎茶賞馬駝路費令極裕此皆恭順

天朝所致土伯特以準噶爾襲始嚴武備我蒙

恩統藏務簡兵繕械有侵圉者足禦之矣所謂修廟延
僧事非奉

旨安敢擅行準噶爾使唯而退

諭獎頗羅酋應使得體

賚幣噶爾丹策凌忌之訐頗羅鴈不善理煎茶務

諭曰頗羅鴈奏準噶爾衆有侵害土伯特讐喇嘛等不願前往故不之給爾奏頗羅鴈念拉藏汗仇辦給爾使諸物俱未協朕為大君不分內外頗羅鴈與爾等皆僻處遠地彼此互有違言朕豈肯偏聽爾遽罪頗羅鴈乎復

詔駐藏副都統傅清等偕頗羅鴈議防準噶爾十年

詔駐藏大臣三年一代十一年

諭頗羅噶曰爾素効忠誠勤勞懋著自朕御極以來悉心靖共凡事竭力奮勉辦理妥協甚屬可嘉著加特恩於爾子內封一長子日後承襲王爵總理藏務所係甚要其善擇才堪嗣爾悅服衆心裨益公務者以聞頗羅噶子二長珠爾默特策布登次珠爾默特納木扎勒珠爾默特策布登病足以長子讓弟珠爾默特納木扎勒詭讓兄頗羅噶愛少子請以珠爾默特納木扎勒為長子

允之頗羅鴈善服衆為諸噶卜倫所敬事有綏奔喇嘛
扎克巴達顏者書其名瘞詛之事覺頗羅鴈欲弭
變輕議綏奔喇嘛扎克巴達顏罪

上嘉之

諭鎮壓左道不足患其偕達賴喇嘛協輯唐古特衆十
二年頗羅鴈卒

遣官賻祭以珠爾默特納木扎勒襲郡王爵兼理衛藏
噶卜倫務

諭傳清曰珠爾默特納木扎勒不更事或未服唐古特
衆且頗羅鼐以暴疾亡珠爾默特納木扎勒或以綏
奔喇嘛扎克巴達顏故與達賴喇嘛構隙不肖衆起
而間之不無滋事虞爾其留意體察導珠爾默特納
木扎勒任用舊人復以協理藏務當如頗羅鼐存日
宣諭衆噶卜倫知之會準噶爾台吉策妄多爾濟納
木扎勒復遣使赴藏煎茶入寺詭避痘以已卒守
門不令官兵從

上以準噶爾狡甚

飭嚴防雖歸巢勿稍忽珠爾默特納木扎勒奏藏地謐
無事請撤官兵歸

上念頗羅鴈有安藏功且蒙恩厚珠爾默特納木扎勒
必無異志不從撤兵請適滋疑不如示之信

詔可復

諭達賴喇嘛嗣勿令準噶爾使入藏雖固請弗允珠爾
默特納木扎勒詭稱準噶爾衆襲唐古特至碩翁

圖庫爾遣兵備喀拉烏蘇徙達木番衆不數旬揚
言準噶爾至阿哈雅克自率兵往備

上聞之

詔撤喀拉烏蘇兵及達木番歸牧勿惑衆十五年駐藏
都統傳清左都御史拉布敦以珠爾默特納木扎
勒攜兵離藏告益是時珠爾默特納木扎勒忌其
兄珠爾默特策布登襲殺之私攜礮至後藏誣籍
噶卜倫輔國公班第達及第巴布隆贊等旋達木

距前藏三百餘里擁衆二千餘不歸奏至

上不忍即誅之

諭曰此或珠爾默特納木扎勒以部衆不皆順擁兵自護且或因弟兄啟釁懼朕問罪妄意離巢穴可苟免此時惟應靜以鎮之待其自起自止在我原無治罪之心則彼亦不生猜疑之念也嗣傳清等密疏叛狀詔侯副都統班第自青海赴藏討罪復

諭四川總督策楞提督岳鍾琪等馳兵往會而是時賊

猖甚梗驛道軍書不達者旬日傳清偕拉布敦計
不急誅賊必據唐古特為變召珠爾默特納木扎
勒至待諸樓甫登起責其罪曰爾違

天子命且忘爾父無君無父罪不可赦傳清趨前扼其
臂拉布敦拔佩刀刺之諭脅從罔治有羅卜藏扎
什者趨下呼賊千餘突至聚圍樓集藁焚達賴喇
嘛遣番僧往護不得入傳清拉布敦死之羅卜藏
扎什攫帑二萬餘挺走翌日達賴喇嘛擒禁之遣番

衆屯要汛諭勿傷漢民抗官軍偕班第達馳疏至
時策楞班第等赴藏就道

諭曰此措置唐古特一大機會也若經理得宜自可永
遠寧謐否則久復別生事端珠爾默特納木扎勒敢
懷逆萌由於地廣兵強事權專一嗣此唐古特應多
立頭目以分其勢爾等其詳議善後事宜為一勞永
逸計策楞等至藏磔珠爾默特納木扎勒子達爾扎策
楞及羅卜藏扎什奏傳清拉布敦誅逆被害狀

上召諭廷臣曰從前頗羅鴈實心恭順料理藏中事務
一切安帖

皇考世宗憲皇帝屢次加恩由台吉封為貝勒伊感激我
朝厚恩彌益恪誠朕即位以後封為郡王後因頗羅
鴈年力就衰朕詢伊二子之中孰堪為嗣伊奏稱長
子人輟弱又已出家二子珠爾默特納木扎勒人尚
強幹能勝彈壓因令其承襲迨伊奏事一二次以後
朕於其辭意之間即知其非伊父居心可比日後必

生事端諭駐藏大臣留心體察傳清前經駐藏為伊等所信服遂令前往且慮其勢孤益以拉布敦協同駐藏乃珠爾默特納木扎勒心益狡悖將長兄珠爾默特策布登圖害又與達賴喇嘛素有仇讐既戕其兄遂欲計害藏中不順伊之班第達等其勢將延及達賴喇嘛獨居其地雄長一方近遂將塘汛文書禁絕不通悖逆情形漸益昭著傳清拉布敦稔知其奸摺請便宜從事以絕後患於今年十月初八日奏到

朕以僅二大臣孤懸絕域未可輕舉批令俟班第更
換拉布敦到藏日會同達賴喇嘛及藏中大噶卜倫
等明正其罪以申國法乃傳清等未及接到諭旨即
於十月十三日傳珠爾默特納木扎勒到通司岡加
以誅戮而傳清拉布敦旋為伊屬下羅卜藏扎什所
害總督策楞奏到朕深為憫惻不覺涕零因思傳清
拉布敦若靜候諭旨遵行或不至是但珠爾默特納
木扎勒反形已露倘不先加誅戮傳清等亦必遭其

茶毒則傳清拉布敦之先幾籌畫殲厥渠魁實屬可嘉非如霍光之誘致樓蘭而斬之也夫臨陣捐軀雖奮不顧身然尚迫以勢所不得不然如傳清拉布敦揆幾審勢決計定謀其心較苦而其功為尤大以此實心為國之大臣不保其令終安能不倍加軫悼耶傳清拉布敦著加恩追贈為一等伯入祀賢良昭忠祠春秋致祭傳清並入伊家祠從祀伊等子孫給與一等子爵世襲罔替以示朕褒忠錄庸之至意並

將伊二人為國捐軀之大節明白宣示使天下共知其不得已之苦心否則好事喜功者借此二人為口實而事外無知之人又議其擅開邊釁而仍邀國家如此厚恩者朕豈肯令其是非倒置若此哉十六年策楞等以珠爾默特納木扎勒通準噶爾逆書

聞

諭曰前駐藏都統傅清左都御史拉布敦因珠爾默特納木扎勒逆謀顯著先事翦除奮不顧身忠誠卓越

俱已加恩贈卹入祀賢良祠昭忠祠傳清並入伊家祠從祀不知者或訾二人冒險邀功且議朕為酬庸過厚也今據策楞班第等奏珠爾默特納木扎勒自立名號潛遣其心腹通款準噶爾稱策妄多爾濟納木扎勒為汗且求其發兵至拉達克地方以為聲援幸值準夷內潰所遣使人回藏被獲得其逆書并餽獻諸物是其陰蓄異志勾結準夷罪不容誅設非二臣協力同心決計先發則其遺害藏地將不可言是

二臣之心甚苦而其有功於國家甚大應特建雙忠祠合祀二人春秋致祭丕昭勸忠之典復

御製雙忠詩紀之有雙忠蹟烈傳斯篇他年以待信史編之句是年策楞等議設駐藏兵五百防汛兵千自

咱拉山至拉卜賽那木自阿哈雅克至碩翁圖庫

爾各設汛哨以達木番歸駐藏大臣轄視內地例置佐領驍騎校各職每年一察視設噶卜倫四以輔國公班第達扎薩克台吉車稜旺扎勒色玉特

色卜騰喇嘛尼瑪嘉穆錯任之別設代奔五第巴
三堪布一分理藏務隸駐藏大臣及達賴喇嘛轄
唐古特正副二使均歸達賴喇嘛四噶卜倫附以
達勿私遣

允之

敕四噶卜倫曰西藏廣興黃教為清淨善地達賴喇嘛
掌管西方釋教廣演經法從前供養喇嘛一切事務
原設噶卜倫四人至珠爾默特納木扎勒諸事擅專

不與諸噶卜倫商議負恩任性潛懷異圖因此駐藏
大臣將伊正法噶卜倫事務不可一人專辦特令策
楞等簡選賢能仍照舊例分設噶卜倫四員公同辦
事爾等當感戴朕恩尊敬達賴喇嘛和衷協力勉
供職勿存私意致生猜疑勿分彼此互相瞻顧遇有
重務稟知達賴喇嘛與駐藏大臣等遵奉指示而行
爾等其感恩宣力副朕興黃教安羣生至意準噶爾
台吉喇嘛達爾扎尋請赴藏煎茶延唐古特喇嘛

上不允喇嘛達爾扎復因拉達克汗致書唐古特達賴喇嘛責勿擅請明年喇嘛達爾扎遣申前請

上仍不允

詔議防藏地班第等奏準噶爾通藏隘有阿里那克桑騰格里諾爾阿哈雅克四路那克桑路稍近已設汛拉達克距阿里近雖與準噶爾互市必不令兵入境葉爾羌亦可通阿里中有大山隔之且阿里距藏兩月餘聞賊至易備惟騰格里諾爾阿哈雅克

路較濶亦俱嚴設汛唐古特有馬兵萬餘步兵萬
五千餘若準噶爾自騰格里諾爾阿哈雅克至則
令車校旺扎勒以蒙古唐古特兵禦之檄衮布達
克布等番兵援由阿里那克桑至則令色玉特色
布騰以近牧兵禦之檄阿里兵援班第達及尼瑪
嘉穆錯留藏護視達賴喇嘛至班禪喇嘛駐扎什
倫布距前藏七百餘里值用兵令移居前藏若準
噶爾傾衆至則移達賴喇嘛班禪喇嘛至泰寧以

駐藏官軍及唐古特兵屯要汛待大兵援

允之準噶爾使久不至

諭達賴喇嘛嚴備復定議西自阿里東至喀拉烏蘇增

雜拉沙木等十三汛二十年大軍討準噶爾擒台

吉達瓦齊

諭唐古特部知之達賴喇嘛獻銅佛三慶親

詔納魯阿睦爾撒納叛擾伊犁

詔唐古特復設汛二十二年第七世達賴喇嘛示寂

上軫悼之二十三年阿睦爾撒納走死逆回布拉呢敦
霍集占等復叛據葉爾羌喀什噶爾

詔勿撤唐古特汛二十四年拉達克汗謀定邊將軍兆
惠取烏什阿克蘇等城將抵葉爾羌奏請助勦回
逆

諭曰爾遠處邊地感戴恩澤朕鑒爾忱深為慰悅大軍
進勦回逆凡所克城俱設兵駐防今布拉呢敦霍集
占力窮勢蹙必將棄巢遠遁朕不以出兵擒勦事責

爾倘逆回竄入爾境爾當擒獻藏所朕必優加恩賚
若不遵奉諭旨異日朕必知之非爾益也是年大軍
定葉爾羌喀什噶爾霍集占等竄巴達克山

詔拉達克汗勿復遣偵巴達克山尋函獻霍集占首
詔撤唐古特汛西陲蓋自此永定二十九年

欽定西域同文志

御製烏斯藏即衛藏說曰藏地處蜀與滇之徼曰藏云
者非華言實番言也番又或謂之唐古特今班禪額

爾德尼所居實稱藏達賴喇嘛所居實稱衛元明時
有烏斯藏朶甘衛指揮諸司之名或以為異於衛藏
而不知實同也蓋嘗以唐古特文字詳覈互証乃知
烏斯藏即衛藏其音其義無不一以貫之也且以音
言斯蓋薩之餘音滿字為薩音半字為斯音唐古特
收音之斯字即與國書之伊字收音通則烏斯之切
為衛如烏伊之切為衛也亦猶阿伊之為愛噶伊之
為該喀伊之為開也國書斯字伊字雖各為收音然

唐古特收音字無伊字而有斯字由烏斯推之而愛
亦阿斯該亦噶斯開亦喀斯何不可通之有若夫衛
藏之為義則衛蓋彼言中也非華言置衛之謂也以
烏合斯為衛音而中義藏則切匝阿為藏音而其義
則淨之謂也唐古特若老若幼無不知之今以不識
唐古特文字之人而與一二譯出華言中辨其是非
豈非嚼蠟哉或又曰衛既以中為義則今之所謂前
藏之說何居曰此更非唐古特之本有而興於今之

華言也然以今日疆域言之自打箭爐取道由東南
迤及西南先經喀木次衛次藏是全藏形勢固宜前
喀木而後藏而衛適其中處之地喀木之木為半字
音應從上喀字而其義則邊界之謂也今稱前後藏
者則因二地有達賴喇嘛班禪額爾德尼居之而達
賴喇嘛位居長遂並以藏屬之更易中為前而今自
京都目之且統以為西藏云耳然則烏斯藏之即為
衛藏不愈信哉夫藏之內屬肇自元代音譯展轉沿

薩為斯原無歧舛惟文士墨守蠹簡既不克兼諳西
竺之書而彼中服習梵文者又豈能筆授心通取腹
地史乘傳誥一一悉為釐訂毋惑乎此攷文之難也
予因輯同文志類次西藏所隸為系三合切音者特揭
是說以發其凡三十六年

詔建布達拉於

避暑山莊右肖衛式初厄魯特崇黃教噶爾丹策凌
建都綱於伊犁河濱北曰固爾扎南曰海努克設

西勒圖四集喇嘛千餘以塔本集賽輪值瞻之蒙古謂五為塔本謂輪值為集賽每歲首及盛夏台吉宰桑等以瞻禮至後固爾扎為阿睦爾撒納所燬大軍定噶爾丹亂

詔如固爾扎式建安遠寺於

避暑山莊北隅以準噶爾台吉達什達瓦屬來歸者居其側青海厄魯特及喀爾喀杜爾伯特諸台吉值班秋

觀輒

命瞻禮至是布達拉落成土爾扈特汗渥巴錫和碩特
台吉恭格等挈數萬衆來歸

詔瞻禮之蓋以綏靖荒服非惟闡揚黃教為也四十四
年班禪喇嘛奏請入

覲祝

釐

詔建扎什倫布於布達拉左肖藏式四十五年五月

駕南巡旋班禪喇嘛使伊什巴爾珠布等迎

覲於趙北口

命觀龍舟水嬉六月

幸承德府

駐蹕避暑山莊班禪喇嘛使穆占巴等齎輜重至

詔居扎什倫布旁舍時盛暑仍服氊毳

詔賜紗葛并

給銀及藥物七月班禪喇嘛至舊例以達賴喇嘛班禪

喇嘛有高行

諭旨至始下牀入

覲惟令跽不拜至是班禪喇嘛固請拜
上嘉其誠敬聽之

賜宴萬樹園

詔瞻禮布達拉八月行

萬壽慶典班禪喇嘛稽首頌無疆九月扈

蹕旋

賜宴南苑以香山昭廟藏工

詔慶讚之班禪喇嘛自崇德時通貢至是凡三世初封

曰羅卜藏吹吉嘉穆錯次曰羅卜藏伊什皆

敕賜班禪額爾德尼號次曰羅卜藏巴爾丹伊什如之
是役也以不召至跋涉二萬餘里入

覲蒙古內扎薩克四十九旗及喀爾喀厄魯特諸部汗
王公台吉聞之莫不歡忭舞蹈執役觀

慶典十一月班禪喇嘛示寂

敕於所居建清淨化城明年送舍利歸藏復

遣官齎金冊印封羅卜藏丹巴旺舒克扎木巴勒嘉穆錯為達賴喇嘛時其父第巴阿木布木前卒

諭曰第六世達賴喇嘛羅卜藏噶勒藏嘉穆錯之父索諾木達爾扎曾封輔國公今新達賴喇嘛已賜冊命其父已故未及受封其兄索諾木達什為哲卜尊丹巴呼圖克圖父著授輔國公爵如索諾木達爾扎例索諾木達什尋卒

詔以哲卜尊丹巴呼圖克圖弟喇布丹納木扎勒襲四
十八年理藩院議奏索諾木達什以達賴喇嘛故封
輔國公爵子喇布丹納木扎勒繼襲嗣若仍予世襲
則與來歸有功之蒙古王公等無別請俟喇布丹納
木扎勒出缺後停襲嗣有似此者皆令承襲一次
詔如議以非世爵故不立傳四十九年

遣官齎玉冊印

賜達賴喇嘛復

敕封班禪喇嘛之瑚畢勒罕為班禪額爾德尼以幼未
賜名西藏自達賴喇嘛班禪喇嘛外爵五輔國公三一
由貝子降襲一由鎮國公降襲一定世襲一等
台吉扎薩克一等台吉二一現奉

旨停襲詳各傳

欽定外藩蒙古回部王公表傳卷之九十一